

MONITUM

DE HAC

EDITIONE.

NEMO nescit duos esse antiquæ Historiæ, cum Sacræ, tum Profanæ, oculos; Chronologiam, nimirum, & Geographiam; quas si sustuleris antiqua monumenta evolventi, perinde feceris ac si cæcum, iter per avia facturum, duce destitueris. Ut Chronologiam omittamus, quis sine Geographiâ in Historiâ Ecclesiasticâ subinde non cespitabit? Quis intelliget, cur hi aut illi Episcopi in certa Concilia convenirent, certis Primatibus ac Metropolitibus, in Ecclesiastico ordine, subjecti essent, si nesciat quibus in Provinciis sedes eorum Episcopales sitæ fuerint? Quis adsequetur lites olim, de finibus Dioecesium, & Jurisdictione Ecclesiasticâ, frequenter inter Patriarchas & Præsules ortas? Destitutus hac Cynosurâ miscebit fines Provinciarum & Dioecesium, Episcoposque cognomines, qui in Historicis Veteris Ecclesiæ monumentis permulti occurrunt, passim confundet. Urbes, præsertim minùs celebres, quibusnam in locis sitæ fuerint cum ignoret, non intelliget cur hic, aut ille Episcopus subscripserit nomen suum hujus aut illius Synodi Canonibus. Quod si fortè aggrediatur Episcoporum, quorum sedes in subscriptionibus omissæ sunt, indicare, innumeris erroribus se se implicabit; nisi Ariadneum Sacræ Geographiæ filum habeat, quo se se eo labyrintho explicet. Exemplum insigne & memoratu dignum ejus rei habemus, in R. P. JOANNE GARNERIO, Societatis Jesu Sacerdote, insigni eruditione Ecclesiasticâ celeberrimo, qui in Dissertationibus ad priorem partem *Marii Mercatoris*, aggressus est designare sedes Episcoporum, qui sederunt in Carthaginensi & Numidicâ Synodis, anno ccccxvi. contra Pelagianos congregatis. Hominem enim permultis in sedibus Afrorum & Numidarum Præsulum adsignandis errasse, cognomines Episcopos, Urbesque non dissimilis appellationis confudisse, imò & emendare frustra Ecclesiasticas tabulas, sanis in locis, conatum esse, quod in Ecclesiasticâ Africæ & Numidiæ Geographiâ minùs exercitatus esset, ostendit, in Epistolâ ad *Anton. Magliabechum*, eminentissimæ vir eruditionis & dignitatis HENRICUS Cardinalis NORISIUS. Idem etiam, nonnullis in rebus, à *Car. à S. Paulo* & *Lucâ Holstenio* dissentit; ejusque rationes legisse non poenitebit. Eam viri doctissimi Epistolam, quæ cis montes rarior erat, nuper in Augustinianâ Appendice recusam legere licebit. Ex

* * 2

eâ